

# Eijeiei

Omm Sunndaach iss de Schorsch e bissi späder onn de Stommdisch kumme, weil er unn soi Kättche zwaa Daach Besuch hadde vunn ihrne Dochder unn dere ihr gons Familie. Unn die wollde gleisch nooch emm Kaffeedrinke hoomfahm unn su long iss de Schorsch halt debei gebliwwe.

Eijeiei, hodder gesaad noochdem er gesotze hott, eijeiei, wennde siehst was die Enkel su mache schunn omm friehe Moie, doo konnsde disch nor uffreesche.

No, seet de Karl, was mache donn die Enkel omm friehe Moie?

No ja, gibbt de Schorsch ze Antwort, die mache joo nix Beeses. Nor babbele dun die nitt. Doo konnsde frooche wasde willst, die gugge disch korz oo, nuschele was vor sisch hie unn donn ...

Unn donn?, habb isch gefroochd.

Seet de Schorsch: Donn guggese widder uff ihr Dinger, su Dinger, iwver die merr frieher Händy gesaad hott unn die heit all Ei unn su haaße.

De Karl hott de Kobb geschiddeld. Ei unn su? Su haaße die?

De Schorsch druff: Doch nitt Ei unn su. Die haaße Ei-Fon unn Ei-Pädd, unn weil isch nitt gewissd habb, was dess ferr Dinger sinn, hott merr ooner vunn moine Enkel su e Proschbeggd in die Hond gedriggd, isch sollts lese, dess alles wär vunn Äbbel.

Isch musst lache unn saach: Vunn Äbbel, ja, so heeßt die Firma mett dene Eier, aach unser Enkel sinn gons scharf uff su e Zeisch.

Egal, seet de Schorsch, egal wie die Dinger haaße, nor dass die alls doo druffgugge unn druff erum drigge, dess hotts Kättche unn misch gons nerwees gemachd. Doo sitze drei nimmi su gons kloone Kinner omm Disch unn gugge unn drigge unn zeische sisch Bilder – unn donn grinse se odder lache unn donn fahnse mett de Händ iwver de Bildscherrm unn donn hawwe se schunn widder e onner Bild odder enn onnern Text, den se lese unn uff den se ontworde, unn donn lachese widder. Unn uff oomol seet dere ihrn Vadder: So, sagt der Oma und dem Opa Auf Wiedersehen, wir müssen los, unn donn mache die alls noch uff dene Dinger erum, bis dere ihr Mudder e bissi laut werdd. Donn stiehnse vumm Disch uff, numme ihr Dinger, ihr Mäntel, rufe Tschüss unn schunn fährt de Vadder los, die Kinner winke – unn waaßde wasse gleisch druff mache? Die sinn nor e paar Meder weit eweck unn schunn klebbern se widder uff dene Ei-Dinger erum. Saacht emol, wenn ihr Besuch habbd, iss dess aach bei eich su?

De Karl seet: Gons genau su. Isch frooch misch nor alls emol, ob die nitt su gons langsam dess Babbele verlerne due, weil monschmol glaab isch, die dun, aach wennse newernonner sitze, sisch eher ooschreibe als e Wort ze saache.

Isch nigg. Die wern all maulfaul. Dess Schlimmsde debei iss, dass die sisch aach nitt mieh streite, weil doodeferr missdesse joo ess Maul uffmache. Unn grad dess Streite, dess hawwe mir ahle Ehekriddel joo lerne misse, grad dess rischdische Streite mächt joo aus, dass merr long sesommebleibd unn nitt gleisch de Beddel hiewerfe dut.

Doo moont de Karl: Du moonst, dass wenn die Junge nor schreibe unn sisch nimmi mett su rischdisch kräffdische Ausdrigg streite, dass don nitt su long sesommebleiwe wie mir drei mett unserne Weiwer?

Ja, dess moon isch, saach isch. Unn wonnse donn außenonner gieh, machese dess aach schriftlich iwvers Ei-Ding.

Eijeiei, seet doo de Schorsch, was Dinger!

Eiern Honnes